

Ո Ր Ո Շ ՈՒ Մ ԹԻՎ – 318
վարչական տույժ նշանակելու մասին

12 դեկտեմբերի 2018թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով Աշոտ Հրաչի Ավդալյանի վերաբերյալ նյութերը,

Պ Ա Ր Զ Ե Ց Ի՝

2018 թվականի նոյեմբերի 6-ին ՀՀ ՊԵԿ ՄԴՊՎ և Հյուսիսային մաքսատուն-վարչության Բավրայի մաքսային կետի աշխատակիցները Շիրակի մարզի Մայիսյան համայնքի վարչական տարածքում, Աշոցք-Գյումրի մայրուղու վրա կանգնեցրել են Վրաստանից ՀՀ ժամանած, ՀՀ քաղաքացի Աշոտ Ավդալյանի կողմից վարած <<Mitsubishi Chariot>> մակնիշի, 350Q533 հաշվառման համարանիշի ավտոմեքենան և ուղեկցել Հյուսիսային մաքսատուն-վարչության մաքսային հսկողության գոտի: Մաքսային զննման արդյունքում ավտոմեքենայի բեռնախցիկում հայտնաբերվել է առանց հայտարարագրման ՀՀ մաքսային սահմանով տեղափոխված 90 կգ քաշով խեկ տեսակի նմանվող սառեցված ձուկ:

Փաստի առթիվ Աշոտ Ավդալյանի նկատմամբ ՀՀ մաքսային օրենսգրքի 203-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ 90 կգ քաշով ձուկը վերցվել և ի պահ է հանձնվել <<Ձյունիկ Տերմինալ>> ՍՊ ընկերության մաքսային պահեստ:

Վարչական վարույթի ընթացքում Աշոտ Ավդալյանը բացատրություն է տվել այն մասին, որ 2018թ. նոյեմբերի 6-ին իր երեք ընկերների հետ անձնական գործերով մեկնել են Վրաստան: Ախալքալաքի շրջանի առևտրի կետերից մեկից գնել են 30 կգ քաշով խեկ տեսակի ձուկ անձնական օգտագործման համար: ՀՀ վերադառնալիս իրենց ավտոմեքենաներով իրենց հետ միասին ՀՀ մաքսային սահմանը հատել են նաև իրենց ընկերները՝ 2 ավտոմեքենաներով, որոնք նույնպես գնել էին խեկ տեսակի ձուկ ՀՀ տեղափոխելու նպատակով, և տեղավորել իրենց ավտոմեքենաներում: 2018 թվականի նոյեմբերի 7-ին Բավրայի մաքսային կետով հատել են ՀՀ մաքսային սահմանը և լրացրել ուղևորային մաքսային հայտարարագրեր, որոնք կորցրել են: Հասնելով Մայիսյան համայնքի տարածք որոշել են ամբողջ ձուկը տեղավորել իր կողմից վարվող <<Mitsubishi Chariot>> մակնիշի, 530Q533 հաշվառման համարանիշի ավտոմեքենայի բեռնախցիկում, որպեսզի մյուս ավտոմեքենաներից ձկան հոտ չգա: Որոշ ժամանակ հետո ավտոմեքենան կանգնացրել են ՀՀ ՊԵԿ ՄԴՊՎ աշխատակիցները և հայտարարել, որ իրենք ՀՀ մաքսային սահմանով առանց հայտարարագրման ապրանք ենք տեղափոխել: Քանի որ իր ընկերները շտապում էին՝ ՄԴՊՎ աշխատակիցները միայն իրեն ու իր ընկերոջը ուղեկցել են Հյուսիսային մաքսատուն-վարչության մաքսային հսկողության տարածք և ապրանքը զննելուց հետո վերադարձրել 20 կգ քաշով ձուկ, իսկ մնացած 90 կգ ձուկը վերցվել է ու հանձնվել ի պահ: Իր նկատմամբ կազմվել է մաքսային կանոնների խախտման վերաբերյալ արձանագրություն:

62. ԻՎ.
15.02.19

ԵԱՏՄ մաքսային օրենսգրքի 104-րդ հոդվածի համաձայն՝ ապրանքները ենթակա են մաքսային հայտարարագրման դրանք մաքսային ընթացակարգով ձևակերպելու կամ սույն Օրենսգրքին համապատասխան սահմանված այլ դեպքերում: Մաքսային հայտարարագրումն իրականացվում է հայտարարատուի կամ մաքսային ներկայացուցչի կողմից, եթե սույն օրենսգրքով այլ բան սահմանված չէ: Մաքսային հայտարարագրումն իրականացվում է գրավոր և (կամ) էլեկտրոնային եղանակով:

ԵԱՏՄ մաքսային օրենսգրքի 105-րդ հոդվածի համաձայն՝ մաքսային ընթացակարգերով ձևակերպելիս, բացառությամբ <<մաքսային տարանցում>> մաքսային ընթացակարգի, մաքսային մարմին է ներկայացվում ապրանքների մասին հայտարարագիր: Օրենսգրքի 110-րդ հոդվածի համաձայն՝ միության մաքսային տարածք ներմուծվող ապրանքների մասին մաքսային հայտարարագիրը ներկայացվում է մինչև ապրանքների ժամանակավոր պահպանման ժամկետի լրանալը կամ սույն օրենսգրքով սահմանված այլ ժամկետում: Միության մաքսային տարածքից արտահանվող ապրանքների մասին մաքսային հայտարարագիրը ներկայացվում է մինչև Միության մաքսային տարածքից դրանց մեկնումը, եթե սույն Օրենսգրքով այլ բան սահմանված չէ: ԵԱՏՄ մաքսային օրենսգրքի 2-րդ հոդվածի 7-րդ կետի համաձայն՝ հայտարարատուն այն անձն է, որը հայտարարագրում է ապրանքներ կամ որի անունից հայտարարագրվում են ապրանքներ, իսկ 35-րդ կետի համաձայն՝ մաքսային հայտարարագրումը մաքսային մարմնում մաքսային հայտարարագրի միջոցով ապրանքների վերաբերյալ տեղեկությունների, ընտրված մաքսային ընթացակարգի վերաբերյալ եւ (կամ) ապրանքների բացթողման համար անհրաժեշտ այլ տեղեկությունների հայտագրումն է:

ԵԱՏՄ մաքսային օրենսգրքի 83-րդ հոդվածի համաձայն՝ որպես մաքսային ընթացակարգերով ձևակերպվող ապրանքների հայտարարատու կարող է հանդես գալ՝ անդամ պետության անձը՝ որն օտարերկրյա անձի կետ կնքված այն գործարքի կողմերից է, որի հիման վրա ապրանքները տեղափոխվում են Միության մաքսային սահմանով, որի անունից և (կամ) որի հանձնարարությամբ կնքվել է նշված գործարքը, որն ունի ապրանքների տիրապետման, օգտագործման և (կամ) տնօրինման իրավունք, եթե ապրանքները Միության մաքսային սահմանով տեղափոխվում են այն գործարքի շրջանակներից դուրս, որի կողմերից մեկն օտարերկրյա անձ է, որը Միության մաքսային տարածքում գտնվող օտարերկրյա ապրանքների մասով օտարերկրյա անձի կամ անդամ պետության անձի հետ կնքված գործարքի կողմերից է: Օրենսգրքի 84-րդ հոդվածի 2-րդ կետով սահմանված են հայտարարատուի պարտականությունները, այն է՝ կատարել ապրանքների մաքսային հայտարարագրում, մաքսային մարմին ներկայացնել մաքսային հայտարարագրում հայտագրված տեղեկությունները հաստատող փաստաթղթեր, ներկայացնել հայտարարագրվող ապրանքները և վճարել մաքսային վճարները, իսկ 3-րդ կետի համաձայն հայտարարատուն անդամ պետությունների օրենսդրությանը համապատասխան, պատասխանատվություն է կրում սույն հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ հայտագրելու, ինչպես նաեւ մաքսային ներկայացուցչին անվավեր, այդ

թվում՝ կեղծ և (կամ) ակնհայտ ոչ հավաստի (սուտ) տեղեկություններ պարունակող փաստաթղթեր ներկայացնելու համար:

<<Եվրասիական տնտեսական միության>> մասին պայմանագրի 46-րդ հոդվածով սահմանված են ոչ սակագնային կարգավորման միջոցները, այն է. Երրորդ երկրների հետ առևտրում Միության կողմից ընդունվում են ոչ սակագնային կարգավորման հետևյալ միջոցները՝ 1) ապրանքների ներմուծման և (կամ) արտահանման արգելք, 2) ապրանքների ներմուծման և (կամ) արտահանման քանակական սահմանափակումներ, 3) ապրանքների ներմուծման և (կամ) արտահանման բացառիկ իրավունք, 4) ապրանքների ներմուծման և (կամ) արտահանման ավտոմատ լիցենզավորում (հսկում), 5) ապրանքների ներմուծման և (կամ) արտահանման թույլատրական կարգ:

ԵԱՏՄ մաքսային օրենսգրքի 2-րդ հոդվածի 10-րդ կետի համաձայն՝ արգելքներն ու սահմանափակումները Միության մաքսային սահմանով տեղափոխվող ապրանքների նկատմամբ կիրառվող ոչ սակագնային կարգավորման միջոցներ են:

Պարզելու համար, թե որքան է կազմել 90 կգ քաշով ձկան մաքսային արժեքը և առանց հայտարարագրման ՀՀ մաքսային սահմանով տեղափոխման դեպքում առաջացել են ոչ սակագնային միջոցներ չկիրառում, թե ոչ, 30.11.2018թ. և 12.12.2018թ. գրություններով հարցումներ են կատարվել ՊԵԿ մաքսային հսկողության վարչություն, որտեղից ստացված 04.12.2018թ. գրությունների համաձայն՝ 2018 թվականի նոյեմբերի 7-ի դրությամբ ոչ ԵԱՏՄ անդամ երկրներից ՀՀ ներմուծված 90 կգ քաշով խեկ տեսակի ձկան մաքսային արժեքը կազմել է 87.300 ՀՀ դրամ, իսկ չվճարված մաքսային վճարները կազմել են՝ 6110 ՀՀ դրամ (մաքսատուրք) և 18685 ՀՀ դրամ (ԱԱՀ,) ինչպես նաև նշվել է, որ ձկան ներմուծման դեպքում չեն կիրառվում ոչ սակագնային կարգավորման միջոցներ:

Այսպիսով, նյութերով պարզվել է, որ 2018 թվականի նոյեմբերի 7-ին ՀՀ քաղաքացի Աշոտ Ավդալյանը առանց հայտարարագրման ՀՀ մաքսային սահմանով տեղափոխել է 87.300 ՀՀ դրամ մաքսային արժեքով, 90 կգ քաշով խեկ տեսակի ձուկ, այսինքն՝ Ա.Ավդալյանը թույլ է տվել ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ նախատեսված մաքսային կանոնների խախտում, այն է՝ ՀՀ մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում առաջանում է մաքսային վճարների պակաս հաշվարկում կամ չհաշվարկում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ և ՀՀ ՊԵԿ մաքսային հսկողության վարչության 04.12.2018թ. գրությամբ:

Վերոգրյալի հիման վրա և ղեկավարվելով ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ, 206 և 221-րդ հոդվածներով,

Ո Ր Ո Շ Ե Ց Ի՝

1. Աշոտ Ավդալյանին (ծնված՝ 16.03.1983թ., ՀՀ, ք. Գյումրի, փող. Չայկովսկու 234/330 տնակի բնակիչ, անձնագրի համարը AP0653869) ճանաչել զանցառու ՀՀ մաքսային

օրենսգրքի 203-րդ հոդվածի 1-ին մասի 2-րդ պարբերությամբ և նրան տուգանել առանց հայտարարագրման ՀՀ մաքսային սահմանով տեղափոխված 90 կգ քաշով ձկան չհաշվարկված մաքսային վճարների 50 տոկոսի չափով՝ 12.397 ՀՀ դրամ:

2. Որոշման մասին հայտնել Ա.Ավդալյանին՝ պարզաբանելով, որ այն կայացնելուց հետո 10-օրվա ընթացքում կարող են բողոքարկել վերադաս մաքսային մարմին (ՀՀ ՄՕ 222-րդ հոդվածի 2-րդ մաս) կամ ՀՀ Վարչական դատարան 2 ամսվա ընթացքում (ՀՀ Վարչական դատավարության օրենսգրքի 72-րդ հոդվածի 1-ին մասի 1-ին կետ):

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՅԱԿԱՆՅԱՆ